



Naomi Arpagaus e Luis Coray, circumdai da troccas.

FOTO AUGUSTIN BEELI

Misteris misterius, mort e sulegl

Dapi l'entschatta d'avrel san ins visitar a Laax ella casa da cultura Cularta in'expoziun culla tematica dallas troccas. Ils artists Luis Coray e Naomi Arpagaus han retschert ina «harta alva». Quei ch'els muossan ei ton interessant sco misterius.

AUGUSTIN BEELI/FMR

«Tgei ha quei da far cun troccas?» sedamonda in u l'auter che selai intimar da visitar la Cularta. Sper il parcadi principal, denter vitg e lag, ei la casa da cultura a Laax situada en in liug privilegiu. Duront che la Cularta ei aviarta, carmalan actualmeins gronds placats cun hartas da troccas ils passants. Entrar spontanamein ei denton buca da cussegliar. Per visitar quell'expoziun duess'ins quintar silmeins in'ura e mesa. Lu san ins emprender, guder e filosofar. «Sche Vus veseis enzategi, lu mirei vinavon» gi Luis Coray, gl'artist da Laax cussegliar d'entrar e da seschar inspirar.

Il giuvenessen gi

Ils curaturs dall'expoziun «Troccas – Tarotkarten» ella Cularta ein Yvonne Gienal e Remo Arpagaus. Tier la tematica han els dau a Luis Coray ed alla giuvna studenta d'art Naomi Arpagaus – era ella da Laax – ina «carte blanche». Las duas alzasas dalla casa ein buca surcargadas cun ovras. Ins sto semplamein entrar cul gust da seschar menar. L'expoziun ei informativa e misteriosa. Ch'ins detti troccas digl entir mund ei strusch enconuschent en Surselva. E ch'il giug

hagi connex cull'astrologia era buc. En ina nisha dalla sala ein varga 30 scatlas cun hartas da Tarot exponidas. Ei dat tarot egipzian, tarot per orachels, hartas per «leger il wor», sco Luis Coray declara, in'expressiun ch'ins udeva pli baul en casas romontschas.

Dallas differentas culturas han ils dus artists seschau influenzer. Ina gronda part dallas lavurs exponidas ein da Luis Coray. El muossa maletgs che han connex cun troccas. Per exempel quel dallas 22 arcanas grondas, ina gronda ovrta ch'el ha realisau ensem cun Yvonne Gienal. Da Coray vesan ins in maletg d'acril sin teila cul tetel «Il giuvenessen gi». Naomi Arpagaus muossa entagls en linol e stampas. Ella ha per exempel seschau inspirar dallas figuras, dalla roda dalla veta, dils simbols. Ella contribuescha era cun ina installaziun participativa. Vid ina meisa plein colurs, ina meisa dil pictur-artist, envida ella da seser e far in auter giug; baghegiar ina casa cun hartas, metter sill'emproma la pazienza e la perseveronza. Enamiez la sala ha ella creau sin in teppi ina collecziun da divers objects che associeschan cun requisits dallas figuras da troccas. Ins vesa in tgiern, in ruog, in tgiert, ina latiarna, figuras da marionetta, ina

spada. Tut ei rasau ora sin in teppi tgietschen cun muster folcloristic.

Intermediar art

Duront la viseta ha Luis Coray remarcau ch'ei savessi esser sia davosa expoziun. El ha dau gl'impuls da baghegiar la Cularta. Buca per el, mobein per enrihir la cultura da Laax. Quei ch'ei gartegiau, la casa da cultura ei instituzionalisada e buca d'ignorar. Naomi Arpagaus ei engaschada ferm el program accumpignont. Per tuttas classas dalla scola primara e scalem superiur ha ella menau workshops. Ils affons e giuvenils han luvrau cun differents materials, linol, fotografias, collaschas e colurs. Quell'intermediar art d'art fa Naomi Arpagaus el plaunterren dalla scoletta veglia, in liug zun adattau per tals projects. Buca da surveser e surudir ei l'installaziun audiofona el zuler dalla Cularta. Leu audan ins il tun original d'in giug da troccas cun tschintschar, cun Vitus Dermont, Peder Camathias, Meinrad Cathomen ed Urs Gautschi. Vitus Dermont ha scret in carnet plascheivel per introducir principiants ei giug sursilvan. Troccas ei buc in strieg – mo tuttina eis ei strieg, quellas stoda figuras misteriusas.

Ussa maunca mo aunc il secretariat

Ellas vischnauncas Falera, Laax, Sagogn e Schluein s'avonzan las preparativas per entscheiver gl'onn da scola 2022/23 sco menaschi communabel e fusiunau. La piazza dil menader strategic ei occupada, medemamein quella dalla direziun e dils dus meinascolas.

AUGUSTIN BEELI/FMR

Falera, Laax, Sagogn e Schluein ein vidlunder da fusiunar lur menaschis da scola. Suententer che tuttas quater radunonzas han approbau il december vargau ils statuts dil construct niev ha quella da Schluein fatg sco emprema il proxim pass. Ella ha approbau gl'uorden da scola ed il niev reglament disciplinar. A Laax ei la fatschenta tractandada per sonda proxima, Falera e Sagogn vegnan a far quei las proximas jamnas.

Giuseppe Puopolo, il president

Per incumbensa dallas quater vischnauncas han ils dus meinaprojects Martin Mathiuet e Josef Willi preparau la fusiun aschia ch'il menaschi da scola vegn ad esser semtgau sigl 1. d'uost 2022. Sin damonda dalla FMR ha Martin Mathiuet confirmau ch'il president dalla cumissiun da scola seigi elegius, medemamein la direziun generala sco era dus meinascola. Sco president dalla cumissiun strategica havan ins encuret in persuna externa che meina il post en fuorma da mandat. Quei post confidan ins a Giuseppe Puopolo, domiciliaus a Mauren el Principadi da Liechtenstein. El meina actualmeins la FKB, ina gronda cassa da malsaus el Principadi. Puopolo ha vasta experienscha da menar ed organisar, el fa part da divers cussegls d'administraziun, el preside-



La Scolaviva survegn sigl 1. d'uost 2022 structuras novas cul consorzi niev. FOTO AUGUSTIN BEELI

scha era l'Associaziun per pedagogia curativa dil Sarganserland-Werdenberg, purtadra dalla Scola da pedagogia curativa a Trübbach.

Gion Caviezel, il directur

Giuseppe Puopolo presidescha la cumissiun da scola ch'ei responsabla per la strategia dil

consorzi, cun el fan ils quater gerai da scola dallas quater vischnauncas part da quei gremi. Sco menader operativ digl entir menaschi ei Gion Caviezel elegius. Gl'um dall'annada 1965 ei carschius si a Cuera, el ha denton stretgs ligioms familiars cun Luven e discuora era romontsch. El surpren ina piazza parziala sco directur general d'in menaschi cun 50 persunas d'instrucziun e bunamein 400 affons. Gion Caviezel ha liunga experienscha pratica sco scolast e pedagog, el ei staus menader dalla scola da Cuera ed inspektor el cantun Turgovia. La direziun generala operativa dil consorzi niev surpren el igl 1. d'uost 2022.

La piazza da menader dalla scola primara Laax-Falera e dil scalem superiur surpren Otmar Graf da Domat. Era el ha vastas experienschas ella branscha dall'educaziun e discuora romontsch. Tiel Parc Ela ha el menau tochen uss ils projects da scola. Carla Berther-Brunold surpren il post da coordinatura dallas scolas Sagogn e Schluein. La scolasta vegn ad empunir ils fils enteifer la direziun cun sias enconuschentschas localas e dil lungatg romontsch. Mo aunc in post ei vacants enteifer l'organisaziun operativa: Actualmeins enquera il consorzi aunc ina persuna per la piazza dil secretariat dalla scola. Il post-clav sto vegnir occupaus sigl 1. da fenadur 2022.

SEDRUN MUSTÉR

Simona Barmettler banduna la regiun

Suententer esser stada engaschada duront quater onns sco directura da Sedrun Mustér Turissem banduna Simona Barmettler la regiun sisum la Surselva la fin d'october 2022. Sco quei ch'ella ha detg sin damonda dalla FMR hagian motivs persunals menau a quella decisiun:

«Miu partenari viva ella Svizra Centrala ed ei era engaschus

leu professionalmeins. Per quei motiv sun jeu sedecidida da far la midada.» La decisiun da bandunar Mustér Sedrun seigi buca stada simpla: «Jeu hai investau bia energia el svilup da Sedrun Mustér Turissem. Las bialas regurdientschas alla regiun vegnan a restar.» Avon che surprender la direziun operativa tier Sedrun Mustér Turissem era Simona Barmettler stada engaschada plirs onns tier Grischun Turissem. (fmr/hh)



Simona Barmettler vesa siu avegnir ella Svizra Centrala. FOTO MAD

TRUN

Accident mortal a Runclavuns

Margis ei capitau in accident el contuorn dil mies Runclavuns a Trun. In um che era fatschentaus cun lavurs da manteniment ei curdaus a val e sedisgrazias. Sco quei che la Polizia cantunala communichescha, era gl'um dad 81 onns vidlunder da far lavurs vid il trutg stretg. Duront quellus sto el esser passaus naven da quel e curdaus rond 120 meters dalla spunda teissa giu. Demai ch'els confamigliars han buca contonschiu el la sera, ha la Polizia cantunala alarmau cuort suenter las 21.00 las equipas da salvament. Commembers dalla secziun Péz Terri dil CAS han anflau il disgraziu, il miedi dalla Rega ha constatau ch'el era mort. La Polizia cantunala sclarescha ils motivs exacts digl accident. (cdm/fmr)

TRUN

Quen 2021 cun in surpli d'entradas

Il cussegl da vischnaunca da Trun ha approbau unanimamein il quen communal 2021. Il quen current siara cun in surpli d'entradas da rond 730 000 francs, il gudogn avon amortisaziuns importa 1,3 milliuns francs. La vischnaunca ha fatg investiziuns netto da pressapauc 1,4 milliuns francs. Cheutras ei il deivet netto dalla vischnaunca s'augmentaus per exact 100 francs per habitont sin totalmeins 2,4 milliuns francs. Las investiziuns principals fatgas igl onn vargau pertuccan la contribuziun al Runal la Péra (100 000 francs), la Via Dalisch – Via Chilgieri (471 000 francs), igl acquist dalla maschina communal (122 500 francs) sco era l'investiziun ella Via Munt (834 000 francs) e la Via Nalds – Via Rost (260 000 francs).

Garantir la segirtad publica

Intensivamein ei il cussegl da vischnaunca sefatschentaus il mardis sera dalla lescha da polizia. En vesta alla tractaziun da quella ha la suprastanza communal constatada: «Duront ils davos onns havin nus adina puspei stuiu far per senn ch'ei maunca mieds legals per mantener e proteger igl uorden public. Cun ina lescha da polizia che completescha la legislaun federala e cantunala less la suprastanza communal mantener la segirtad publica ed igl uorden public, garantir la segirtad da persunas ed animals e proteger igl ambient e la proprietad da donns e prighels.» Denter auter duei vegnir relaschau in scamond da fugis artificials e bengals e quei cunzun per las fiastas digl 1. d'uost e da Silvester. Il motiv principal persuententer ei la protecciun dils animals, mo lu era per impedir incendis pli gronds e che la natira vegn engreviada da rumien. Medemamein duei vegnir risguardau ella lescha il ruas public da firaus e dumengias. Sco dis da ruas local fixescha la lescha ils firaus da s. Giusep, Sontgircrest, Nossadonna d'uost e Numnasontga. Il cussegl da vischnaunca ha repassau criticamein ina part dalla lescha. El ha decidu ina secunda lecziun per aschia dar allas cusseglieras ed als cussegliers la caschun d'inoltrar propostas a scret. (cdm/fmr/hh)



Igl uorden public duei survegnir ina basa legala a Trun. FOTO HANS HUONDER